

Piripaihiyaapi Utipiho

Kimandi Piripaihiyaapi Utipimandapi Nesipihande

Poriho Romihanda konihi napwitati bindata utipiho kimo jipatipiyahore 62 A.D. hura. Isihiya giwunyaahohiyihiya Piripaihanda bimohiyihiya piwiha wiwa kwituniwihaiwa kanihauni kandapi Poriho utipiho kimo jipatipiyahore. Iyati ami Piripaihiya nawiho Porihoai anditiwiwitandihoni nunyauhi ami kandapimaawi gaare undatiho utipiho jipatipiyati nusoasataise. Siyati Poriho titihi utipiho jipatipiyati nusoasataise.

Piripaihiyaapi Piwiha Napimasataise

Poriho isihiyai ipirete gaahure undisiha (1:1-11)

Porihoai nasisoaari nusoaipasiwaiwa ambipati yaawati ami naanjihandi konihi nepi notaise. Saihi ami Kiraisiho konihi anditiwipi notaise. Aihi ami sandaahi Poriho maarititandihandisati konihi bimaami naindihandapiha (1:12-30)

Kiraisiho kaipatamatiyaati titihi kireti nyahi nahatiyaani ambipati yaasihaiwa naitihaawo tisiha (2:1-30)

Poriho isihiyai piwiha nehaha asiwa katiwunjohiyihiyaami piwiha atiwi namepise undisiha (3:1-21)

Poriho isihiyai saiwi saiwi kaiwise undati komi piwiha osasepihaasiha (4:1-23)

1 ¹Nini Porihoninitihi Timotehotihi maisahuraani Jisasi Kiraisihomi otipipatihuraani utipiho kimo jipatipiyaha sahi Autaahaatihomi isihiyaati Jisasi Kiraisihoaisawi maasi timaamaitohiyihiyaati aunahipati awaipati (taunihandi) Piripaihanda bimohiyihiyaatapuni ami isihiya Kiraisihopi giwunyaahohiyihiyai iwinjatohiyihiyaapuni ami otipipatihyaatapuni nusoasahaayo.

²Autaahaatiho nyami Apihouni ami Awaisiho Jisasi Kiraisihouni sangi sami maariho nepi napaisaatisamapi gaahati kasimi jatatamanitaise.

Poriho Autaahaatihoai Kinyi Gaahone Gaare Undataase

³Nini nahateweti sapi gwinyaataahura gaapunditi Autaahaatihoai kinyi gaahone gaare undataato, ami sahi gaahaiwa kiyohiwaiwaapo.

⁴ Aindi ami nini waati asakaindi maarititi sapi pihindi nisi gaapipati nahatewaatihi nahateweti Autaahaatihoai piwaunditi gaapundataayo. ⁵ Nini saindi maarititi Autaahaatihoai kinyi gaahone gaare undotimandi apaapimaahae, ami sahi Piripaihiyaati Autaahaatihomi isihiyai Autaahaatihomi piwiha gaaha waniha Jisaasihopiha ausaati isihiyai kaunditandihandapi sahi nawiho naninyawi anditinipi ningisawi maasi timaamaitauhe. Saiwi wuwani piwiha gaaha waniha Jisaasihopiha namasawi atiwi kopi giwunyaapi kaimi napiwi wani kimuraatindihandape. ⁶ Aindi ami nini saindi gwinyaataate, kiya gaahati kiyohitimandi sandi Autaahaatiho kiyaamihetapi gaahaiwa taati kiyataise. Siyati ko kaindimandi kiyai neti komi gwinyaati maaritirihiretemataise. Siyati Autaahaatiho kiyaisi konihi kawimi noti noti asisiha Jisaasiho japihi nasonihuraatitande, ndi gwinyaataayo.

⁷ Iyataati ami sahi kiyohitimandapi nga titihe, ndi gwinyaataayo. Autaahaatiho ningisi gaahati kanisati, ami komi otipipati kimati komi piwiha awusaitandihati nanimihi kiyataayo. Kiyonihi ami sangisangi nahatiyaati maasi ningisawi timaamaitaati kiyahaawi sangisi nisi maariho apipaahi aungwohandi nasanyati nisi maariho samiheti ahondaise. Nini napwitohipipihini napwititi bimaati ami awaisawihiya nini kiyohitihandapi gaatiwi nanimaapi nanisenihauhi wihoanjiha kaundataayo. Nini piwiha titihi akaaha ausaahonihandi kandi kiya piwiha Autaahaatihomi mimaipaimbi asireti ausaapaise, ndiwi piwiha nepi nisihetepinimawaayopo. Aihi nini akaaha titihi ausaataayo, unditi kiyaisi nunjati titihi kaundataayo, kiya Autaahaatihomi piwiha akaahe titaatiwo. Saiwa siyonihi sahi ningisawitotihandapi maaritataayo. ⁸ Autaahaatiho aimi mmose, nini napiti sangi jasondandi pihindi gwinyaahoniho, ami nini sangi Jisaasiho maariho nasamipatamataindi nisi maariho nasanyataayo.

⁹ Aindi ami nini nisi gaapipati kimati sapi gaapunditi Autaahaatihoai sapi piwaundataayo. Sahi Piripaihiyaati isihiyai maariho nunyohitihandi samiheti waati anyaati tisaitati noaipaitando. Iyonihi ami sahi gaahandi gwinyaitaatiwhandi pihitiwi nepi, ami sami amitiha sahi isihiyai maariho nunyohitihandapi biyati nga jainjapwaatamaitando. ¹⁰ Aiwi ami sahi baiwi nepi mmoniwi maipihapa namapi ami nehi apipaahi gaahapa, ami titihitamasipipaahihini nepi ami kapa japepihiriwi kaiwi bimitaatiwo. Ami sahi saiwi kaiwi bimaami nuwi asisiha Kiraisiho isihiya kopi giwunyaahohiyihiyai neti kiya otipipati kopi kawisohipati tipitapaati usonati katapi wihoanjihandi nawihomatiyati nunyonihura wapa maipihapaapi piwiha owehiyaati apipaahi ainahiyihiyaitititaatiwo. ¹¹ Ami sahi saiwi Kiraisiho neti anditisiwati jatatanamanati Autaahaatihomi titihi gaahaiwa sangi samiheti kasiwaiwaami nandapa akipipa noipati samiheti tisaitati ahotitando. Siyati titihi gaahaiwa tisaitati samiheti

ahotanihi, ami kaiwa titihaiwa ami gaahaiwa kiyohiwaiwa noaipati, ami kaiwetapi sahi Autaahaatihoi ambipati awaipati nunyawu koai nepi mepi autaaahemwaitaatiwo.

**Porihon Napwinjitihanda Isihiya Taahiyihiya
Autaahaatihomi Piwiha Atisawaayopo**

¹² Nisi naisihiyaati nisataiwi Kiraisihopi giwunyaahohiyihiyaate, nini sangisi nasesipati neti gisunyaati sandi kasatitandiyo. Ningi isihiya nepi winirapi nanipuhauhi kimbihini Romihanda napwititi bindataayo. Ami kimandi napwitotimandi isihiya Autaahaatihomi piwiha atitaatiwi nisaputataamaise. Owetise. Autaahaatihomi piwiha gaaha waniha isihiya taahiyihiya aunahipati taahiwaiwaara taawi atiwi newaayopo. Nepi kaapi taawi gwinyaawaayopo. ¹³ Aihini ami isihiya tunniwi yahwinohiyihiya awaisiho Sisaahomi anititihini masaataati jatohiyihiyauni, ami isihiya usa kimbihini nahatiyauni nini napwitotimandami tanyaahaapi mmonihopo. Ami nini Kiraisihopi giwunyaati komi otipipatihoninindi ami komi otipipati kawisonihini kandapindiwi ningi nepi nanipuhauho. ¹⁴ Iyauhi ami naisihiya taahiyihiya nisataiwi Kiraisihopi giwunyaahohiyihiya nini napwitotimandapi gwinyaawaawi kiya watipitiwi Awaisihopi giwunyaapi, ami kiya windi yamaiwi ami watipihini bitotawa Autaahaatihomi piwiha Kiraisihopiha isihiyai kaundawaatopo.

¹⁵ Iyataati ami sandihini akite, isihiya usa nisapi apowihini ami kiya nisapi itihapipa manditihirisawi Kiraisihomi piwiha ausaawaayopo, ami Autaahaatihomi isihiya Kiraisihopi giwunyaahohiyihiyainepi iwiriwitaatiwo. Usa siyauhinihandi kandi ami usaahini maariho gaahoisawi Kiraisihomi piwiha titihini gaahiretini isihiyai iwitatamanitaatiwi gwinyaapi ausaawaayopo. ¹⁶ Ami siya siyohiyihiya Kiraisihoaisuni ami ningisuni kiyaami maariho naninyawi ami piwiha waniha gaahaapi maariwimawaawe. Aiwini nini napwitotimandapi piwiha gaaha wanihai neti anditiwiwitandi andititihini bitohohitihandapitihini kiya mmonawaawi ami piwiha ausaawaayopo. ¹⁷ Iyauhi usa aimini jihini katohiyihiya siya maariho titihimetahoisawi kiya sawana ambipati awaipati nepi noaipapi awaisawihiyaatitaatiwuni, ami ningi nini napwititi bimohipihini daahini nepi iwirininiwi yaasihandi waatini nanimitaatiwi piwiha ausaawaayopo.

¹⁸ Ami kiya siyauhinihandi kandi nini kandapi windi pihini gimunyaaho. Ami kiya tanyaaha gaahaapo, ami tanyaaha maipihapi ausaawaawisangi nini gwinyaata sandi awaindihandimaahe. Ami kiya piwiha Kiraisihopiha ausaawaayopo. Isi ami nini sandapi wanisangi maariitihini ami ipoti ipotisangi koninini maariitihini nuto. ¹⁹ Ami nini koninini maariitihini nuto. Ami sahi nisapi taawi gaapundiwi Autaahaatihoi piwaundauhi ami Kiraisihomi Itipihoni

Gaaho ningi taati anditiniwati nitatamanataiso. Isi ami kimaiwa ningi naanjanisati yaasamaiwa nini taati neti bimohiwimaiwaatihapi nenimati Autaahaatiho nuwanoaasonihi nini noaipaito. ²⁰Nini nisi maariho nahatoaisati watipindi saindi gwinyaataayo, nini wapa sehimwaati kamaindi, ami Kiraisihoai komi maariho yaawihandi windi namumwito, nisapi ko windi maarimitihando. Iyonihi ami kapetapi ningi manyihandi nini windi namaitando. Ami nini nasisoaaruni ami wani kimura kurauni isihiya usaapi windi yamaindi watipindi piwiha katito. Ami saindi kiyataati nini asohonini bindataatisangi, ami nini napotaatisangi Kiraisihoai ambipati awaipati numwisanihi ami komi ambipati isihiya nepi autaahi isiwatitaatiwo. ²¹Ami nini sandi apaapimaato, nini asohonini komi otipipati kawindi ami aimi nehi Kiraisihopaahaindihoninisi aimi apipaahi komihoninindi koaisatindaayo. Isi ami ningi isihiya niwisaihi napotaatisangi aimi koaisatindaayo, ami nini ambipati awaipati taati koai nunyataayono. Aindi gaahandi asitimandi neti nehi nanihaindi naanati yaasiwaiwa owetih Kiraisihoaisati yamihapataatihi aimi bindataayo. ²²Ami nini nisi ambipatisati asohonini bindataataahi, ami nini Awaisihomi otipipati kawito. Ami nini windi moho napwitando e asohonini bimitando ndo. ²³Sandapi nini yatiwi gwinyaataayo. Nini wani kimandi bimohitimandi namasi Kiraisihoenda naindi koaisati bimitandi maaritataayo. Ami ningi gaanimatitaise. ²⁴Sandi nini ngandaahandi kandi ami nini sangisati kimaapi otih utaaari bindataati sangi neti jatatamaniti, ami anditisaiwitandi sandi apipaahi awaindi gaare. ²⁵Ami ningi sandapi ginunyaatati ninjapwainjihi, ami nini sangisati daahi bindataati jatatamaniti anditisaisanihi, ami kandapi sahi sami Kiraisihopi giwunyaahohitihandapi maarititaatiwi nini mmoniti gwinyaataayo. ²⁶Isi ami nini jahira sangisenda napisanihi, ami sahi maaritiwi Kiraisihomi ambipati niwimaitaapo, ami ko nyangi kanyiwaiwaapo.

²⁷Ami apipaahi awaindihandi sahi kaitaatiwihandi siyate: Sahi Kiraisihomi piwiha gaaha waniha kasatauhi atiw nehoirihireti wapa kaiwi, ami daiwi bitosawise. Ami sahi saisaihi nini napiti sangi jasoto e ami windi napiti masisonataatisangi sahi maariho naasohitanih utaahe nehi naasomataiwi daiwi bitohopo tisaihi nini atitando. Aiwi sahi piwiha gaaha wanihaapi gwinyaahohitihandi sami tiworisa nepi tisaipinditaawi jatitaatiwo. ²⁸Aiwi tiworisa sangi tisaipindohiyihiyai nemapi sahi kiyaapi windi yamaiwi andititiwi maariho naasoaisawi nga bitoaitaatiwo. Siyawaawi sati siwipati nepi kiyai sahi nunjitaatiwi, ami kiyai Autaahaatiho nemati ami sangi ko japihi nasamaitandihandapi siyati nanyamaitandihyaane undiwo. ²⁹Ami sahi Kiraisihopi giwunyaaitaatiwaahih Autaahaatiho sangi nasamihanataamaise. Sahi kopi yaasihaiwa naitaatiwi maawi ko sangi nasamihanataise. Ami

sikauraahi sahi Kiraisihoai ambipati awaipati nunyawī niwimaitaatiwo. ³⁰Nini sangisati bimohura naanjati yaasihaiwa wira anisihi sahi mmoniwihiyaate. Aiwi ami wani naanjati yaasihaiwa taati wira anisihi nini nepi niyohiwimaiwaapi sahi aimi atisawaayopo. Aiwi ami sahi sawanaatisangi sikiyahaiwa tiwati wira asisihi taawi newaayopo.

Kiraisiho Ipatisanati Neti Kaimumwaan̄i Sahi Japi Kaitaatiwe

2 ¹Kiraisiho sangisi anditisaiwati ami komi maariho nasamindihandi sangi neti nasipipaisihi sami maariho biyati wisaitataise. Autaahaatihomi Itipihō Gaaho Kiraisihomiheti bimisihō sangi neti tisamaamaisihi ami sahi won̄i waan̄i ami wowaatapi sami maariho gaaho gwinyaapi gaahati kainiwi mmotinawaayopo. ²Sahi timaamaitiwi maariho naasohi utaaho nehi naasomataiwi gwinyaapise. Aiwi sahi ususaati won̄i waan̄i wowaati maariho nunyawī naminiwi napaisaati bimaawise. Sahi sandi saisaihi nini sapi apipaahi nga maarititimito. ³Kinyi wapa kiyapaahapa nehi kinyi kiwahonyapaahi gwinyaapi, ami usaapi manditipaimbi ami kiwahon̄i naimaatipihireti windi kamaimē. Kinyi yatihī ipatisanipi isihiya usa aimi awaisawihiyaimatiwi bimohiyihiyaami yatihī otitihī pinumbwi kiyai kinyi niwimaapi autaahiwipe. ⁴Aimbi ami kinyi ikipipa kinyi kiwahonyihapaahi itatamanipi minjatipi ami usaamihapai maawi nepi iwitatamanipi kiya itatamaniwi bimitaatiwihandapi kinyi iwinjatime.

Kiraisiho Ipatisain̄ihī Autaahaatiho Koai Nuwimaataise

⁵Sahi gwinyaahohitihandi ami sami dahopa piwiha ami wapa kaiwi daiwi bitohohirihireti Kiraisi Jisaasiho kaipatamataiwi kaiwise. ⁶Kiraisiho yapipataapihi sangi nasati yamihapataatihī bimisura nahataapaatihī osamati ko Autaahaatihomatiyaho Autaahaatihoaisati naasaataati gwinyaati ami naasaataati awaisihoematati bimainjahore. Siyahondaahandi kandi ko Autaahaatihoematati Autaahaatihoaisati maasi naasaataati bimindihandi sawaho neti itatamanitando tati gwinyaati ko windi anitisati miwatise. Owetise. Kandi ko nehi namihaati namataise. ⁷Ko siyati Autaahaatihotati Autaahaatihoaisati bimimbipihī namati namihaamapi noaipati nehi otipipatihoematataise. Iyati ko noaipati nyahi isihyaanamī ambipati neti ami nehi nyamatiyati utaahoematataise. ⁸Ko siyati nehi utaahoematati noaipati yatihī ipatisanati Autaahaatiho kaundirihireti atiwisati kaimi noti ami yaawihandi neti ipi titihī atawihateti sikiyati napotaise. ⁹Ko siyati kaindihandaahi Autaahaatiho koai niwimaati otipipati ami ambipati apipaahi autaahitahati awaipati usaami ambipati nusatipihahati nunyati ahiwisataise. ¹⁰Isi ami nahatiya mihaati yamihapataatihyauni ami maapi yapipataapihyauni ami yamatihī yapipatami nyepēpihyauni Jisaasihomi

ambipatapi atotipiwesawi koai niwimaitaatiwo. ¹¹ Aiwi ami isihiya nahatiya kiyaami maahomwaanjapi ausaapi satiwi “Jisasi Kiraisiho so nyami Awaisihore,” titaatiwo. Aiwi ami kiya nyami Apiho Autaahaatihore tiwi koai niwimaapi komi ambipati mepi autaahepumaitaatiwo.

Sahi Gaahaiwa Kiyohiwaiwa Sisihaamatiyati Isihiyai niwusaatane

¹² Isi ami nisi naisihiyaati nisataiwi Kiraisihopi giwunyaahohiyihyaate, nini jihura napiti sangisati bimohura sahi nasisoaari napaitiwi Autaahaatihoi atiwihiyaate. Isi ami wani kimura nini sangisati maasi windi bimimaati kaanihi wapihi bimohurimuraisangi sikaiwi Autaahaatihoi atiwiwise. Sangi Autaahaatiho ko maaritati gwinyaasirihireti japepihiritaatiwi japihi aimi nasamaasihyaatisi sahi kopi yaiwi itipi apipaahi ipotihandi koaisawi asitimatiwi bimitaatiwi japihi kiyaatangisinihi nasamaitandihandapi anditati napamapi otipipati kaimi nuwise. ¹³ Ami sandihi Autaahaatiho sawaho samiheti otipipati kiyataise, ami sangi neti anditisaiwati gisunyaahonihi ami sahi ko maaritati gwinyaasipipa japepihiriwi kaitaatiwi ami sangisangi apipaahi maaritiwimapi kapaahihi mmonipinjawi kaiwi japepihiritaatiwo.

¹⁴ Sahi sami itihinniwi naumwaarinihohipipa njujaaha namamapi nahataapa nehi gaahireti kaiwise. ¹⁵ Sahi saisaihi ami isihiya sapi sisaiwihiye, maatisaihi ami sahi nga ainahiyihyaatitiwi, ami wapa maipihapaapi piwiha samiheti owehiyaatititaatiwo. Aiwi sahi maipihapa wapa owehiyaati Autaahaatihomi manyinyaatititaatiwo. Ami sahi isihiya apipaahi maipihya suhiri maasapiho ainjihipipaamatiyahiyaami otihatihini bindawaayopo. Bindawaawi sahi gaahaiwa Autaahaatihomihireti kiyohiwaiwaaraahi sahi kiya asihatinditihini bimohiyihiyai kaumbwaatami sisihaamataiwi taawi kiyaamiheti niwusaatawaayopo. ¹⁶ Sahi piwiha akaaha isihiyai asiyaimatitaatiwihandi numwitandihani katiwunjawi kimaasi sahi naitaatiwaahi nepise undiwi nunyawaayopo. Isi ami sahi sikireti kaimi nuwise, ami Kiraisiho japihi nasonihura nini sapi tihaapaindi maarititi sandi nisi otipipati anditati napamati kiyohipati nehi yatitipihati kiyataamaayo, akipipa nimaatahati kiyataayo, ndi maarititaano. Aindi ami nini tusatipatiti njuhitohitihandami akipipa ninihimatiti naitaano.

¹⁷ Nini jihura napiti Autaahaatihomi piwiha kasatonihini sahi Kiraisihopi giwunyaawaayopo. Aiwi sandi sahi kopi giwunyaahohitihandi wapa nandapa kohasipihoni nga biyati waamainjotihapaamataiwi Autaahaatihoi komi otipipati kawiji gaarehandi nunyawaayopo. Isi ami ningisangi isihiya niwisaihi napotaati nisi jitipati sahi gaarehandi nunyohitihandami tiwathihaati nuhaamataataahi gaare, ndi maarititi ami sangisatisangi waati mitaahi maaritito. ¹⁸ Isi ami sangisangi maaritiwi ami ningisawi maasi waati tisaitiwi maaritiwise.

Timoteyi Epapirotaitaasiyaapitahaare

¹⁹Ningisi Awaisiho Jisaasiho satati, “Kinyi isihiya Piripaihiyaapi Timotehoai natipusoase,” ndonaahi koai neti nandusoasitandi gwinyaati jatataayo. Koai nini nandusoasisanihi sangisaapihi nasati noaipati Kiraisihopi giwunyaapi gaahaiwa kaiwi bimohiwaiwa mmonati neti atisati nesisati kandonihi nini sapi tihaapaindi maarititando.

²⁰Isihiya sapi pihitiwi nitaniwi gisunyaapihiya usa ningisawi kimbih windi bimimowi nehi Timotehohisi ami nehi koaisaahih neti nandusoasisanihi ko sangisenda napitaise. Iyataati so Timoteho nisatiyati nini sangisi napiti jasondandi waati pihindi nitandi gwinyaahopatamatiyati sapi waati nitanati pihitati gwinyapenahore.

²¹O ami isihiya usaahi otipipati nehi sawanaamihatapaahih maaritiwi kiyawaahandi kandi Jisasi Kiraisihomi otipipati windi kamaiwihyaahihiso. ²²Timoteho sopaahi sahi aimi ko utaaho siyati setahoe, tiwi mmoniwi gwinyaapihiyaate. Ko metiho wo komi sapihoaisi anditiwuwati otipipati kiyausepaati kaipatamatiyati ningisaha maasi Autaahaatihopi Piwiha Gaaha waniha Jisasi Kiraisihopitiha awusaahaayo. Timoteho siyati Autaahaatihomi otipipati ningisati maasi kaindihandapi sahi aimi mmoniwi gwinyaapihiyaate. ²³Timotehoai sahi bimohipihapi nandusoasisanihi napitaise. Isi ami nini jihi gwinyaati mmondaano, gamaniho ningisi wipiniso ndo. Saindi mmoniti kandosati Timotehoai sapi keti nandusaasito. ²⁴Aihi ami nisangi saindi gwinyaataayo. Awaisiho ningisi sandati, ‘kinyi Piripaihiyai iwinjaita numwe,’ ndati neti nitatamanati natanoaasonihi nini keti napiti sangi jainjaitando.

²⁵Epapirotaitaasiho sami maahomwaaŋi nesi ningisenda napitandi sahi jihi namihaniwi natiwusaasawaayopo. Aiwi nini nenoaahitohipipa sahi koai nunyauhi ko nesisati ningisi naninyataise. Aihi ko nasati naninyati ningisati maasi bindata Autaahaatihomi otipipati kiyataise. Iyati ami ko nisatiyati Kiraisihopi giwunyaasitihanda titihi nisi naisiho akohore. Ko nisihioaŋi andititati bitonda Kiraisihomi pwisipi yaipati isiwati tunnati yahwinjihoematati isihiya piwiha akaahai nepi tipindiwi ipihatiwimaitaatiwiyohiyihiyai piwiha wihoaanjha kaundataase. Isi nini koaisi nga japihi komihyaatangisenda nandusoasisanihi napitaise. ²⁶Iyataati sahi Piripaihiyaati kopi timbipa apipaahi aungwohandi nese, tiwi aimi atiwi newaayopo. Aihi ami ko Epapirotaitaasihoaisangi nisihiya nisi timbipaapi aimi atisowi keti nisi aunahipata nisihiyai winjaita nutaano, tati waati gwinyaataise. ²⁷Sandi ko timbipa awaimbipa nese totimandi titihi akaahe. Ko aimi napwitotahoai Autaahaatiho kopi maariho asipiyati ami nisapisangi maariho asipiyati koaisi komi timbipa nemwati ami nisi maariho asipaindi maariho tindati naanjanitandihandi

nenimataise. ²⁸Isi nini koaisi sangisenda japihi nandusoasitandi watipindi gwinyaataayo. Isi nini sapi pihindi windi gimunyaati, ami naanjhaiwa yiyatimwi windi namaitandi gaasi koai nandusoasitaano, ami noti sangisi jainjahonihi sahi koai usonawaawi sahi kopi nga maarititaatiwo. ²⁹Isi nini koai nandusoasisanahi japihi nasati jainjahonihi koai, nga japihi nasapaise Awaisihomi otipipati naimbi kaimbimapo, undiwi ikwiri ahowiwise. Utaaho siyahosi maaritiwi koai nepi autaahemapise. ³⁰Epapirotaitaasiho Awaisihomi otipipataatihi timbipa neti maanihi napotaise. Iyati ko otipipati sawahopihatapi windi gimunyapimenati Awaisihomi otipipatapimainjihi nini kaanihi bimonihi, ami sahi ningisi anditinipi otipipati ususaani ninawipihahi kaitihaahati sahi ningisi kaiwinapaapi kaitihati, ami sahi koai nunyohipati sami aunahipati neti ko ningisati maasi kiyataise. Kiyati maasi bindihaawi ko timbipa naanjhandi netaise.

Utaaho Kiraisihopi Giwunyaasiho Komi Giwunyaasitihandaahi Noaipati Titihomatataise

3 ¹Nini nisi piwiha katimi nasohiha owemati ami nini sangi sandi kasatataato. Nisi naisihyaati nisataiwi Kiraisihopi giwunyaahohiyihyaate. Sahi Awaisihoaisawi aimi timaamaitiwi aimi komihyaatisi, ami sahi kopi nasisoaari kiyaatinihi maaritimi nuwise. Piwiha aimi kasatohiha jihaati gaasi kasatitaano, ami sahi sawanaati isihya isihyaaisi piwiha nehaha katiwunjohiyihyaapi nga jatiniwi bimitaatiwihandapo. ²Isihya Judaahiyaamihireti japepihiriwi apipaahi titihimetati maipihaiwa kiyohiyihyaapi sahi baiwi jatiniwi bitosawise, ami kiya suhiri apipaahi maipihiramataiwihyaaso. Siya isiya Judaahiyaamihireti japepihiriwi kinyi aimi noaipapi Kiraisihomihonjimatitaapaahi kinyi ambipati namandipape, tiwi watipitiwimapihyaare. ³Kiya satiwi, “Nyahi ambipati namandipataahiyaanisi Autaahaatihomihyaane,” tiwi watipitiwimapihyaare. O ami nyahihi Kiraisihopi giwunyaahotihandaahi aimi noaipawaati titihi akitinihi Isiraherihyaani nyami ambipati akiti yamatihhi nyami maarihoatihhi aimi namandipataahiyanimatihhaayo. Iyaati Autaahaatihomi Itipiho Gaaho nyangi neti anditinyiwati ginyunyaasihhi Autaahaatihopi aunihihiri kataati gaapundaati ami Kiraisihomi ambipati niwimaahaayo. Isihya kiyaami ambipati nehhi yamaati namandipatohitihandi kiyaisi apipaahi akitinihi windi maawitatanaitaise. Isi nyahi kandapi piwiha waati piwaataati pihitaati

^a **3:2** Usihyaami ambipatami atitati namaupwi ahoaapi nupwi nemawaayopo jihura Autaahaatihohi Abiraahamihohi kaundihi kaihi, ami Isiraherihya Autaahaatihomi isihyaane undiwi usaisi nunjitaatiwi kiyohirihireti kaiwo.

gwinyaitihaawimaahae. Owetise. ⁴Ami nisangi nini nisi ambipati namandipandi kiyohitihandapi nga tihaapaitihati kati owe. Ami kandi nini baindi bimitandi ningisi windi nga maanitatamanitaise. Isihiya kiyaaami ambipati nehi yamaati tiwatihati namandipatotihandapi tihaapaiwi genanohiyihiyai nini nusatipihaitihonine. ⁵Nisangisi ami saindihonine. Nisi naati nanimoti bimihisi asisiha ikwiri naasairitihisi wirami mairima sananihi nisi ambipati nanimandipapihonine. Iyataati ami nisangi isihiya Isiraherihyaamihonini Isiraherihonini akohonine. Aindi ami nini jitipati Benjaminihomihatetapi namoyaatiwi nasohiyihyaamihetapi noaipatihonine. Iyataati ami nini titihisi Ipiruhonini piwiha Ipiruha piwandihonine. Ami nisi niyi apiyaisangi Ipiruhasanyuri piwiha Ipiruha piwaatimihanyure. Nini titihisi Judaahiyaamihetapi noaipatihonine. Isi nini jihisi Judaahiyaami winihapipa saiwa wapa simehimwaati nahataapa titihisi japepihiritihisi isitihisi asoyahisi kiyohiwaiwahisi kaindihisi japepihiritihisi kiretapi noaipatihisi Parisihonimandihonine. ⁶Aindi nini winihapipa saiwahisi baindihisi atindihisi netihisi gwinyaatihisi anditindihisi titihisi nga nahataapa japepihiritihonine. Saindihisi isihiyahisi Kiraisihopihisi giwunyaahohiyihiyahisi netihisi nusopisatihisi titihonine. Siyonihisi isihiyahisi ningisihisi nisonawaawihisi Porihohisi winihapipatihisi japepihiritihisi Autaahaatihomihisi ndihetihisi gaahatihisi kiyataise, tiwihonine. ⁷Jihurahisi nini saindihisi gwinyaataayahisi, nini kimaiwahisi kiyohiwimaiwaraahisi anditinihonihisi nini noaipatihisi gaahoninititohisi, ndihisi gwinyaataayahisi. Aihihisi amihisi wani kimurahisi kaiwahisi ahosumwahisi pohipaindimatihisi saindihisi gwinyaataayahisi. Kaiwahisi wapa akipipaamaahae, nehi kaiwahisi nehihaiwahisi bototihisi ahopahisi daatipatihapatamatiyahaiwahisi, ndihisi gwinyaataayahisi. Nini winihapipatihisi Judaahiyaamihisi anitindihisi isitihisi nisi maarihohisi kapetihisi ahiyahisi japepihirataataahihisi Jisaasihohisi ningisihisi nitatamanatihisi japihisi nanimaitandihisi amihisi nisi maipihaiwahisi nenimaitandihisi nisapihisi napwindihandapihisi windihisi gimunyaatihisi, amihisi koahisi niwipiminjitanihisi, ndihisi gwinyaataayahisi. Aindi amihisi nini sandihisi nehi Kiraisihopaahaindihisi koahisi niwipinjitandihisi kopimainjihihisi nini jihurahisi winihapipatihisi japepihiritihisi Judaahiyaanamihiretihisi kiyohipipatihisi nahataapahisi awindihisi nawihohisi nisihetapihisi nihirinjihomataindihisi kapaanihisi namamataayahisi, ndihisi wanisangihisi taatihisi gwinyaataayahisi. ⁸Nini jihisi kaindihisi japepihirohiwaihaisaahihisi ahosumwahisi pohipaindimataamaayahisi. Amihisi wapa nahataapahisihisi nehihaiwahisi ndihisi gwinyaatihisi ahosumwahisi namataayahisi, amihisi nisi Awaisihohisi Kiraisihisi Jisaasihohaisaahihisi usonitihisi niwipaatihisi koaisatititandihandihisi sandihisi apipaahihisi awaindihanditihohisi. O amihisi Jisaasihopihisi sohisi nisi Awaisihohisi, ndihisi gwinyaatihisi kopaahiyataatihisi nini nyahihisi Judaahiyaanamihisi winihapipatihisi titihisi watipindihisi japepihiritihisi jihisi kiyohiwaiwahisi saiwahisi wani nini saindihisi nehi yatitipihaiwahisi bototihisi ahopahisi daatipatihapatamatiyahaiwahisaaso ndihisi namataayahisi, amihisi Kiraisihohisi ningisihisi nanisapuwatihisi nanimaasihopaahaindihisi nehi komihisi otipatihisi

kawindi koaisaahihi niwipinjitando. ⁹Saindi namatosati nini apipaahi komihoninindi Jisaasihoaisati koninihi maasi bimitando. Nini wani noaipati komi ndiheti Autaahaatihoaisati titihoninindaayo. Ami sandi nini asoyaami winihapipa napaititi japepihirataati kandaahi nini noaipati gaahonini titihoninindaamaayo. Owetise. Nini nisi Jisasi Kiraisihopi ko nisi maipihandaatihapi japihi nanimaasihoe, ndi giwunyaahotihanda Autaahaatiho ningisi neti titihonenimasih, ami nini komi ndiheti noaipati gaahonini titihoninimatataayo. ¹⁰Nini saindi Jisaasihoaisati maasi timaamaititi watipititandi gwinyaataayo. Aindi ami komi watipihanda japihi nepasitihandapi ginunyaatitande. Aindi ami Jisaasiho komi otipipati kaimi naihi isihiya pohipiwiwi yaawihaiwa nunyawu tiwauhi napwipatamataindi koai niwipinjati komi otipipati kaisanihi isihiya nusaihi kaindi napwitandi gwinyaati kiyataayo. ¹¹Aindi ami nini saindi gwinyaataayo. Jisaasihoai tiwauhi napwihi ami Autaahaatiho ahowimati japihi numwaasitihandisi, ami nisangi komi otipipatapindiwi nusaihi napwisanihi Autaahaatiho ahonimati japihi nanimaahonihi nepaito, ndi gwinyaataayo.

Porihō Komi Otipipati Owemaitandi Naupwasitihandapihaare

¹²Saiwa aimi katohiwimawaiwaamataindi nini aimi noaipati Kiraisihomihamaanaŋi gaahoninindi Kiraisihopi ginunyaatataise, ndi kasatataamaato. Owetise. Nini nehi saindi kandaato, jih Jisaasiho ningisi nanimahanati nanimaati gaahonenimati komihini ahinisataise. Aih nini noaipati gaahoninititandihandapi komi otipipati anitindi isiti kiyataayo, ko ningisi anitisati niwatipatamataindo. ¹³Isi nisi naisihiyaati nisataiwi Kiraisihopi giwunyaahohiyihyaate, nini aimi noaipati gaahonindaayo, ndi windi gimunyaaho. Owetise. Nini nehi saindi kiyataayo, nini Jisaasihomi otipipati saindi nga kiyataayo, ndi nepemaititi jati kaimi niyataamaayo. Owetise. Nehi nini niyohihihooanaŋi kihooanaŋi jaati otipipati owemaitandihapihi noaipaitandi ruhi niyataayo ¹⁴Nini anditindi taati watipindi notaayo. Nundi otipipati owemaitandihapihi noaipasanihi, ami nini Jisaasihoai niwipinjati komi otipipati dipipataasini anditindi kawisotihandapi wihoanaŋihapa nawihomatiyati ipotihura Autaahaatiho mihaati yamihapataatihi nanimitandihandapo.

¹⁵Nyahi aimi Kiraisihopi giwunyaawaati watipitaahiyaanisi Autaahaatihomihireti gwinyaawa mmona japepihiritihaawe. O ami sami wo wapaapi wireti wipiya gwinyapenataati, owe mireti kaitihaawi gaare maatane. Owe. Nehi Autaahaatihomihandisi koaisi wapaapi biyati namausesipatonaahi Autaahaatiho neti nunjati nusesipati giwunyaitaise. ¹⁶Isi jih wuwanihura Jisaasihomihireti japepihiritihaawi ginyunyainjih kireti japepihira kaimi nasohirihiri kireti japepihiriwi namaamihaapi kaimi nuwise.

¹⁷Nisi naisihiyaate, nini sangisi nasisati kiyonihi mmonihohirihiri kireti japepihiriwi kaiwise. Iyataati isihiya usa aimi nyahi kiyohirihireti nepi japepihiriwihiyai sahi baiwi mwitipisawi iwinjapi mmoniwi nepi kiya kaiwi bimohirihireti sangisangisi kaiwi daiwi bitosawise. ¹⁸Nini kaindisasohirihiri kireti baiwi japepihiritaatiwi nini aimi jhura napiti pihindi kasato. Aihi ami wanisangi kwitipati timihaihi kwitipataasini jihaati kasatataato. Isihiya usa taahiyihiya sapihi nyahi Kiraisihopi giwunyaahohiyihiyaanami otihatihahi yahiya bindawaayopo, kiyaami kiyohirihireti wipaiwi kaiwihiyoy. Isiya siya Kiraisiho ipi titihi atawihateti napwindihandapiha piwihai ahosumwapi kaami tiworisaimatiwi wiri asireti gwinyaapi kaiwihiyoy. ¹⁹Isihiya siya maapi yapipatambi maipihaiwaapaahihahi gwinyamapihiye. Aiwi ami kiyaami ambipatami maaritirihireti maipihaiwa kaitaatiwi apipaahi maaritiwimapihiye. Aiwi ami kiya wiwa mapipaisahaiwa kiyawaahandi kandi kaiwaapi mawitandihandi owetihahi siyahaayo, tiwi maaritiwi kiriwipati tiwaapatiwi katiwihiyoy. Isi isiya siya yaawihandi awaindihandi nepi aunahipati maipihata sisahaapihi nuwi bimitaatiwihiyoy. ²⁰O ami nyahihahi nyami aunahipati apipaahati yamihapataatihahi ahinyondaise. Ami siyaamatiyaati windi kamaitihaawo. Ami kati nyami aunahipati yamihapataatihapiho nyangi japihi nanyamaasiho Awaisiho Jisasi Kiraisiho japihi nasati nanyamaasi mihaati yamihapataatihapi naitandi napitaihi nyahi andititaati watipitaati jatihaayo. ²¹Isi ko Jisaasiho komi watipihaiwa komi yundanyihaisati nasataati ambipati kati wipetihati wanihati watipihati windi namwaapwitihaahati ko sawahomi ambipatamatiyahati nanyamitaise. Iyati ko Jisaasiho komi watipihandaahi nahataapa neti komi otitihemati nahataapai nga osamati jaititaise.

Maariho Naasohitanihahi Gaahireti Gwinyaawaati Maarititihawo

4 ¹Nisi naisihiyaati nisatawi Kiraisihopi giwunyaahohiyihiyaate, nini sangisi nisi maariho nasanyataayo. Aindi nini sangisi napiti jasondandi gwinyaati maaritataayo. Aindi ami nini sapi maarititi ami sapi tihaapiyataayoni, ami sahi aimi kasatohipatamatawi Awaisihoai windi namaamapi kopi andititiwi giwunyaapi bitosawise.

²Nini sainjaahi apopipuraahi Yuhotiyaayi Sindikeyaasangi piwiha kima sandi nasiseniti kasatiti nusaasataayo. Sainjaahi aimi noaipapi Awaisihomihapuraahisi maariho naasohi gwinyaapi timaamaitimi, ami sainjaahi itihitinjitihandi namihaapi gaahireti piwanimi bimaamise.

³Ami nini kinyi nisi naisohongi napaitarihongi otipipati maisihoangaji ninawipihahi kiyohihongi nangisenataayo, ami nisi naimbipuri sapurisi iwitatamanitaapo. Kapuri ningisami maasi Piwiha Gaaha Waniha ausaambimihapure. Kapuruni ami Kiremenihotihahi ami usa ningisi anditinipi Piwiha Gaaha Waniha ausaahohiyihiya siya kiyaami ambipati

Autaahaatihomi utipihō komi isihya asiyaimatitaatiwihyaami ambipati jipatipindisihoaatihi aimi ahusotahiyaare.^b

⁴ Aihī nini sangisi sandi kasatataato. Sahi Awaisihopi nasisoaari kiyaatinihi maaritiwise. Ami jihaati sandi kasatataato. Sahi Awaisihopi nasisoaari kiyaatinihi maaritiwise.

⁵ Awaisiho japihi keti napitaise. Isi sahi isihya nahatiyai bipi napaisaati iwinjaawi nepusosawi bitopi, ami sahi gaahaiwa kiyohiwaiwa kiya mmonda kiyai gaahati iparimatiwi kawiji kaiwi nunjawise.

⁶ Aiwi ami sahi wapaapi waati gwinyamapi namitaniwi ami nahataapa sahi owetati nausetitohipipaahi Autaahaatihoai piwaundiwi nunjepi gaapundiwise. Aiwi ami sahi nahateweti nasisoaari Autaahaatihoai saundiwi, “Kinyi gaahōje gaare,” undiwise. ⁷ Sahi saisaihi ami Autaahaatihomi maariho napaisaatitati yatihiwitindihandi apipaahi awaindihandi nyahi gwinyaawaati mmonihotihandi nusatipihahandisi kandi neti sami maariho, ami amitihā yatihisiwati napaisaatisamati ami sahi Kiraisihoaisawi timaamaitiwi aimi komihyaatisi kandi neti jatatamanati jainjatane.

⁸ Nisi naisihyaati nisataiwi Kiraisihopi giwunyaahohiyihyaate, nini sangisi piwiha kima wa sandi kasatitandiyo. Sahi kimaiwaapi gwinyaapise: Sahi nasisoaari apipaahi gaahapaapuni, ami wapa isihya gaahape tiwi mmoniwi nepi mepi autahemaitaatiwihapaapaahihi gwinyaapise. Aiwi wapa apipaahi akitihapaapuni ami wapa isihya autaahi nepi isiwatitaatiwihapaapuni ami nehi titihitahapaapuni ami popitihapaapuni, ami apipaahi sanahiwetihapaapuni, ami wapa isihya gaahape, tiwi mmoniwi kapaahihi kiyohipipa sapaapaahihi sahi nasisoaari nahateweti gwinyaapise. ⁹ Aiwi nini wapa nahataapa sahi kaitaatiwihapa sangisi nasisati kandisasonihi mmoniwi aimi nga nepi gwinyaahohipipa ami wapa nahataapa kapaapi nini piwiha ausaati katonihī ami sahi aimi atiwī nepi, ami sahi ninjihauhi nini kiyohipipa sapa kapa nahataapa sahi nasisoaari kaiwise. Sahi saiwa kaisaihi Autaahaatiho maariho yatihī napaisaatitindihandami tanyaaho, ami maariho napaisaatitindihandi nanyamisiho sangisati maasi bimitaise.

**Porihoi Anditiwitandihapa Piripaihiya Niwusoasauhi
Kandapi Ko Maaritati Kiyai Gaare Undindihandapihaare**

¹⁰ Sahi nisapi nawiho nanusoasohihopi nini apipaahi awaindihandi maarititi Awaisihoai, “Kinyi gaahōje gaare,” undataato. So nawiho netaati kiya nisapi waati ginunyaawaawe, ndi maaritataayo. Sahi kiyaatinihi nisapi ginunyaawaahandi kandi ami daihira

^b 4:3 3 Sandi Autaahaatihomi utipihandaatihi isihya komihyaaimatitaatiwi aimi namihainjawihyaami ambihaiwa jipatipindataise (Piwiha Ausaimaninjīha 3:5; 21:27).

nawihō nanusoasitaatiwihira owetati niwipitihī kandapī windi namaanusoaasawī ami namaaninyopo. ¹¹Nini sandi katotimandi ami nini nawihō owetihī kandapī naumwaarindi kandaamaato. Owetise. Nini masihonya wonya isiwatitī ami taahipīpa wapa isiwatataatisangi sandi kimba nisapī gaare, ndi maarititihonine. Sandi ami apaapīmaato. Nini mmoniti netihonine, wapa taahipīpaisahoninindi ami wapa nehi yahonyaisahoninindaatisangisi sapa nisapī gaare, ndi bimitandi Autaahaatiho neti nanisise. Nanisisi nini nehi maaritito. ¹²Ningisi siyahaiwa nanoaipasihī aimi mmoniti netihonine. Nini wiweti wapa owehonini apīpaahi taanauhohoninindi, ami wiweti nini wapa taahipīpa waati asakiyati ahinotahoninindaatisangisi nga nanihaindi bipi bimaatihonine. Wiweti nini nandandihapa nga tsaitati ahotihī nandi ami wiweti nini nandandihapa apīpaahi owetihī nehi japari kiya janimasihandi kandi bipi bindataayo. Ami nini wiweti nandapa kahapaamapīpa waati nini nandandihamwaanī nusatipīhaati noaipati ahotati, ami nini nandapa ami wapa nini nandi isiwatitī ahotitandihapa apīpaahi yatīhitati nausetitati windi gaametise. Saimainjihandi nini bipi nisi maariho yatihī ipatisandi wititī bimitandi nahataapaatihapī aimi mmoniti netihonine. ¹³Ningisi nahataapa noaipasipīpa nga nini neti ami kaito, ami Kiraisihō komi watipihanda ningisi anditiniwahosi anditinihonihō.

¹⁴Ami sahi nisapī gaahati kaiwi ginunyaapī ningisi apīpaahi naananihi bimonihura anditiniwitandihapa aimi mmoniwī nanusoasawaayopo. ¹⁵Sahi Piripaihiyaati aimi mmoniwīhiyaate. Nini jihī wuwanihura napiti namasati sapihī Piwiha Gaaha Waniha ausaahonihō. Aindi ami kapihī Masetoniyaahanda namasi wiwaraahapī niyonihī, ami nehi sahi Kiraisihōmi isihyaati ningisi nawihō wapa anditiniwati nitatamanitandihapa naninyawaayopo. ¹⁶Nini aunahipati awaipati (taunihandi) Tesaronaikaahanda bindataati nawihō wapa nisi ambipati nitatamanitandihapa owetihī nitandi bimonihī sahi wonjī taahiwaiwaara jinjapihī nawihō naninyawaayopo. ¹⁷Sahi ningisi ambipatāpīhapa wapa naninyami nutaatiwī kandaamaato. Sahi sami gaahati kaiwi iparimatotihanda waati nga kaimi naisaihi ami sangi kandapī gaahandi wihōaanjīhandi Autaahaatiho kasisati nasamitandihandapī kandaato. ¹⁸Ami sahi nisihapa wapa japihī nanimītaatiwī nanewaawaahi nini kapa nahataapa aimi nga kamwaanī netaayo. Aindi ami kapaami tiwatīhaati wapa autaahi waati wamaanī netaayo. Aindi aimi nahataapa neti nini gandaayo, ami sahi wapa nawihō Epapīrotaitaasihoai nanunyahipīpa aimi nesisanimihō. Sapa sahi ningisi nanunyahipīmīpa Autaahaatihoai dipumanitandi nandapa kohasipihō wapa nga waamainjotihapa isihya tihīwī Autaahaatihoai nunyahipatamataiwī nunyauhi sami gaarehandi nunyahipīpaapi ko komi ndimaahomwaanī noaipasihī sapī waati

maaritati netaise. ¹⁹Sahi saiwi kiyawaawaahi nyami Apiho Autaahaatiho Kiraisihomihetapi komi isihyaanangi nanyamitandihapa apipaahi gaahapa nyapi nanyamihainjipipa kahapaamapipa asaketahosi sahi wapaapi nenoahitohipipa kapa waati tisaahiwati sangisi nasamitaise ami sahi aimi noaipapi Kiraisihomihyaatiso.

²⁰Isi ami Autaahaatiho ami nyami Apihoai, kinyi gaahone gaare, undaati asisi nahateweti nasisoari jinjapihi komi ambipati awaipati niwimaawaati mepi autahewaumwaitihaawo. Akite! ²¹Sahi Autaahaatihomi isihyaati nisataiwi Kiraisihopi giwunyaahohiyihyaati sapihi bimohiyihyaati Piripaihiyaatangisi ipotiha nini ipihirete, satataato. Iyonihi ami nisi naisihiya ningisi anditinipi kimbih maasi otipipati kiyohiyihyaisangi sangisi sasatiwi, “Naisihyaate ipihirete,” satawaatopo. ²²Aihi ami isihya usa awaisiho jiho Sisaaho Romihanda bindata nahataapipih jatisihomi otipipati kiyohiyihya Kiraisihopi giwunyaapihyaasi kiyaisangisi sangisi sasatiwi, “Naisihyaate ipihirete,” satawaatopo.

²³Nini sapi nyami Awaisiho Jisasi Kiraisihoai piwaunditi nunjeniti gaapundataayo, ami ko sangisi jatatananati gaahati kasionihi sahi nga baiwi bimitaatiwo.